

歐陽文忠全集

卷之三

內制集卷第六 集八十七

恩州賜契丹皇太后賀乾元節大使茶藥詔嘉祐四年一月

二十四日

卿夙將信聘方止中塗惟茲藥鑄之良加之一作于茗品之美特伸  
頒一作恩賚式示眷懷

恩州賜契丹皇太后賀乾元節臣復奏藥詔同日

卿肅將聘幣來及壽觴載嘉道路之勤宜有頒宣之寵仍伸撫勞當  
體眷優

恩州賜契丹皇帝賀乾元節大使茶藥詔同日

卿將命寶隣講歡壽節屬此暄和之候載惟涉履之勤宜頒品劑之  
良式示眷懷之意

恩州賜契丹皇帝賀乾元節副使茶藥詔同日

卿夙副聘輶來陳壽祝顧川塗之攸邈屬氣節之方和俾頒飲餌之  
歐陽文忠公全集一卷八十七

精式助宣調之理

珍倣宋版印

端午帖子

皇帝閣六首

其一

天容清永晝風色秀含薰五日逢佳節千齡奉聖君

其二

繙索盤中結楊梅粽裏紅宮闈九重樂風俗萬方同

其三

寶典標靈日明離正午方五行當火德萬壽續天長

其四

歲時令節多休宴風俗靈辰重祓禊肅穆皇居百神衛滌邪寧待浴  
蘭湯

其五

香菰黏米著佳名古俗相傳豈足矜天子明堂遵月令含桃初薦黍  
新登

其六

聖主憂勤致治平仁風息澤被羣生自然四海歸文德何用靈符號  
辟兵

皇后閣五首

其一

繭館覆柔桑新絲引更長紉爲五色縷續壽獻君王

其二

槐綠陰初合榴繁豔欲然翠筒傳角黍嘉節慶年年

其三

煙含玉樹風生細日永宮花漏出遲深殿未嘗知暑氣水精簾拂砌  
琉璃

其四

玉壺冰彩瑩寒光避暑宸遊樂未央采艾不須禳毒沴塗椒自己馥清香

其五

蘭若擢秀迎風紫槿豔繁開照日紅嘉節相望傳有舊深宮行樂自無窮

溫成閣四首

其一

香黍筒爲糉靈苗艾作人芳音邈已遠節物自常新

其二

珠箔涼颸入金壺晝刻長鸞臺塵不動銷盡故時香

其三

聞說仙家事杳微世傳真僞豈能知遙思海上三山樂寧記人間五

日時

其四

雲散風流歲月遷君恩曾不減當年非因掩面留遺愛自爲難忘窈窕賢

夫人閣五首

其一

冰壺凝皓彩水殿漾輕蓮繡蘭誇新巧繁絲喜續年

其二

黃金仙杏粉赤玉海榴房共鬪今朝勝盈簷百草香

其三

光風細細飄香轉綠葉陰陰覆檻涼雲物鮮明時節麗水精宮殿侍君王

其四

蓬萊仙闕彩雲中端日一作午欣逢歲歲同皎潔霜紈空詠扇深沉  
玉宇自生風

其五

古今風俗記佳辰樂事深宮日日新巧女金盤絲五色皇家玉曆書  
千春

皇帝回契丹皇帝賀乾元節書

四月日伯大宋皇帝致書于姪大契丹聖文神武睿差皇帝闕下乾  
陽正月紀茲載誕之辰隣聘修歡貺以千齡之祝書言既縟禮幣兼  
豐感著之私數陳罔罄今彰聖軍節度使蕭供等回專奉書陳謝不  
宣白

皇帝回契丹皇帝達皇太后賀乾元節書

四月日伯大宋皇帝致書於姪大契丹聖文神武睿孝皇帝闕下壽  
節屆期隣歡惇契仍導柔慈之旨過申延祝之言兼厚物容用增刻

著顯希侍次達此悰誠今左監門衛上將軍耶律錫等回專奉書陳謝不宣白

恩州賜契丹皇太后賀乾元節人使茶藥口宣

卿等夙奉信函及茲誕節載勤馳傳方止中塗宜有寵頒用伸撫慰恩州賜契丹皇帝賀乾元節人使茶藥口宣

卿等甫臨誕日來講隣歡載惟將命之嚴宜有勞勤之錫俾伸寵賚式示眷嘉

天齊仁聖帝廟開啓祈祥迎福催生金鑑道場密詞三月二十日

伏以高穹降慶方垂佑於邦家彌月告期用薦誠於科籙冀衆真之昭鑒臻百順以儲休

廣聖宮開啓催生道場默表三月二十日

伏以帶韁迎祥慶牒祠之叶應潔壇修薦致精懇以冥祈俾因鱗瑞

以通誠仰冀靈真之報福

內中福寧殿開啓天祺節道場青詞三月二十日

伏以候臨初燠節紀嘉名肅嚴秘殿之居降集清真之馭薦之馨  
報以善祥豈惟敷佑於眇躬兼冀均休於庶品

內中福寧殿罷散天祺節道場青詞同日

伏以薰風應候瑞節紀時按琳簡之真文嚴紫庭之邃宇衆靈來格  
冥感交通嘉乃羣生蒙茲百福載傾虔意鑒此明誠

後苑親稼殿開建鎮星祈福道場青詞二月二十日

伏以祠禊叶應彌月告祥肅依科籙以薦誠仰冀照臨之降鑒錫之  
祉福佑以休一作保寧惟集慶於邦家永延鴻於基緒

萬壽觀開啓求嗣保安道場青詞

伏以廟社降祥宮庭叶慶載涓吉日交薦明誠期仰格於清真俾敷  
延於祉福永昌基祚遐企靈休

景靈宮天興殿開啓催生保慶道場青詞

伏以誕彌叶慶蠲潔修誠嚴秘殿於靈宮誦真文於藥簡通此茲芬  
一作芳之薦祓其薈害之虞仰冀昭回不符鑒祐

護國顯應公廟開啓保安催生道場青詞

伏以正陽旅月載育開祥式因靈宇之嚴交薦精衷之潔仰冀衆真  
之貺數昭百順之休永祚皇圖實希道蔭

賜新除行刑部尙書依前觀文殿大學士知陳州劉沆讓息  
命不允詔四月五日

卿嚮以宰弼之崇屢形懇避居留之任因用均勞而休風藹然嘉問  
時至方深眷倚遽閱奏封顧惟陪輔之邦俾遂便安之請增之美秩  
優我舊臣豈祇循於故常蓋以示夫壤寵膺受之際逡巡以辭雖言  
匪飾文見於能讓而令行已出難矣復還其體余懷往祇新命

雄州白溝驛賜契丹賀乾元節人使郤回御筵兼撫問口宣

四月十三日

卿等聘函時達使傳言旋冒茲炎燠之辰涉此川塗之邈宜申宴錫式示眷懷

賜中書門下戒僭奢詔五月四日

敕中書門下朕纘承不基撫有方夏謂教之不可以家至而行之每務於身先惟是儉勤敢忘勉勵期與羣庶臻于富康而人殆久安驕於佚欲物豐太盛耗以浮虛苟奉養以自私忘僭奢之爲戾士民交黷貴賤靡分惟其彊力之能無復等威之制考於著令雖有舊章顧在攸司鮮聞用法民遂安於常習弊罔革以滋深紀綱既紊於度程風俗以至於流蕩俾朕有欲治之意不能副余之誠心而民多自陷之愚未免煩余之訓導夫令信由於貴始下化先於上行眷予一二之臣其率庶工而警職俾多方之衆勿踰常憲一作法以干刑庶漸革於侈風以共趨於治路凡居室之制器用之度冠服之章妾媵

之數其令中外臣庶遵守前後條詔如有違犯仰御史臺及開封府  
糾察聞奏其諸路州軍卽委轉運使提點刑獄臣寮及逐處長吏施行布告中外咸使聞知故茲詔示想宜知悉

西太一宮續催生道場密詞四月二十六日

伏以吉月迎祥靈禊叶應爰卽清真之宇虔脩科式之儀冀祓滌於  
害災俾敷昭於福應載昌儲慶永佑某圖

東太一宮開啓保夏祝聖壽金籙道場密詞四月二十六日

伏以珍館邃嚴格真靈而來宅明誠蠲潔薦馨茲以交修導迎百順  
之祥及此長贏之序伏願保圖綿固壽曆延長永敷佑於邦家溥均  
休於品庶

爲將來祫享禮畢奉謝內中福寧殿并景靈宮等處諸神表

六月二十五日

伏以清廟有嚴仲冬正序乃先時祭躬講禮文賴真靈之集休俾容

典之咸舉仰膺佳祝彌勵丹衷

爲將來祫享禮畢奏謝諸寺院表同日

伏以宗廟之嚴祭祀惟重矧茲合食之義尤爲盛禮之文乃顧眇躬克成大饗實繄貺祐用薦菲誠

內中爲將來祫享禮畢奏謝露香表同日

伏以月正仲冬禮成大饗所以序昭穆之位格祖宗之靈荷清穹之降休俾盛典之獲舉敢伸昭謝冀達精衷

爲將來祫享禮畢奏謝諸寺院神御表同日

伏以茲者祗率孝心躬修合祭潔精誠而是薦蒙顧享之來臨惟慈聖之降休俾眇冲之成禮敢忘勵翼永荷基圖

爲將來祫享禮畢奏謝永安陵等處表同日

伏以恭承先烈獲守慶基式因冬物之有成載肅廟容而合食上饗不貳克展孝思是惟感慕之誠益勵祇寅之志

爲將來裕享禮畢奏謝泰山廟等處表詞日

伏以茲者因歲物之冬成講祭容而時舉豆籩有序禮樂交修顧惟眇躬克遵威典實賴明靈之佑敢忘報貺之誠

賜步軍副都指揮使涇州觀察使秦鳳路副都部署王凱赴

闕茶藥口宣六月二十五日

卿祗膺召節方屆都畿載惟道路之勤屬此炎薰之候宜頒良劑式示眷懷

賜步軍副都指揮使涇州觀察使秦鳳路副都部署王凱赴

闕生料口宣同日

卿出膺邊寄入恪觀容顧就館以云初方奉圭而來見宜頒餼勞式示眷懷

除宋庠制加恩進封

門下盡其志以饗親因而餞惠爵于朝而示衆所以褒功考典而

歐陽文忠公集一卷八十七

七十一中華書局聚

可稽著國章而有舊矧乃樞機之任惟余鼎鼐之臣飭事齊莊宣力  
左右方此慶行之始宜推寵數之隆推忠協謀同德佐理功臣樞密  
使開府儀同三司檢校太尉行兵部尚書同中書門下平章事兼羣  
牧制置使上柱國廣平郡開國公食邑七千八百戶食實封二千九  
百戶宋庠履行清純器識深茂夙有佳譽蔚爲名臣文足以爲國華  
學足以謀王體入則登于三事備鑒謨猷出則殿于大邦藹存風績  
自還機務頗歷歲時秉一德以協恭出處不更其守展四體而盡瘁  
夙夜匪懈其勞屬盛禮之有成廣推恩而自近按夫輿地特啓於新  
封加以寵名蓋遵於故事惟是便蕃之錫式伸眷倚之懷於戲君子  
者邦之基大臣者民之表搢紳之望所屬老成德業之隆豈煩多訓  
服我休命往惟欽哉可特授依前檢校太尉行兵部尚書同中書門  
下平章事兼羣牧制置使充樞密使特封莒國公仍賜推忠協謀同  
德守正佐理功臣散官勲食實封如故主者施行

除李昭亮制加恩

門下朕卜吉孟冬躬薦清廟祖考來格貺以百福之多慶賜遂行均于四海之廣惟予將相之任是謂股肱之良宜擇剛辰誕揚休命忠果守正佐運翊戴功臣彰信軍節度曹州管內觀察處置等使開府儀同三司檢校太保同中書門下平章事持節曹州諸軍事行曹州刺史上柱國隴西郡開國公食邑一萬一千五百戶食實封三千四百戶李昭亮志尚純懿資識敏明世蒙舊德之餘早邁重熙之盛備于器使奮厥材猷好學詩書知將率之爲體兼推威信撫士卒以克和入則有宿衛之勤出則著扞城之效寄之方面屢守於要藩班乃政條頗一作頻聞於佳譽乃眷別都之重寶司留鑰之嚴擁節秉鈞並享崇高之貴治戎撫俗兼資鎮靜之材茲惟圖任之艱方屬倚毗之意是用因霑恩之浹洽推異數之便蕃廣乃疏封增其真戶仍疇美績褒以嘉名於戲秉德不回所以見始終之操好謙自守乃能居

寵祿之榮汝其欽哉膺此優渥可特授依前檢校太保同中書門下平章事使持節曹州諸軍事行曹州刺史充彰信軍節度曹州管內觀察處置等使加食邑七百戶食實封四百戶仍賜推誠保德守正佐運翊戴功臣散官勳封如故主者施行

除梁適制特授特進加恩

門下王者嚴其宗廟饗必及其時盡其誠心祭則受其福朕躬執圭瓚率諸臣工因百物之成冬格列聖而合食嘉與有位之衆均茲錫祉之繁矧惟槐鼎之舊臣實繫國家之大體宜優新命以告外庭推誠保德忠亮翊戴功臣定國軍節度同州管內觀察處置等使光祿大夫檢校太傅使持節同州諸軍事同州刺史兼御史大夫上柱國安定郡開國公食邑四千七百戶食實封一千五百戶梁適世胄之華早躋仕路藝文自奮繼踐辭科進階顯榮亟被獎擢優游侍從之列嘗奉於清閒出入中外之勤實勞於夙夜既贊樞府遂登宰司啓